



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

IV. De sacerdotali officio post lapsum, si poenitentia secuta fuerit, in pristinum gradum restituendo.

urn:nbn:de:hbz:466:1-15221

habebatur ; in ipsa hac epistola perpende , quia legitur quod inter orientales episcopos & beatum Cyrillum pax fuerit celebrata. Si ergo post concordiam pacis , post satisfactionem amotæ dubitationis , hæc eadem epistola scripta est, constat quia non est catholica, quæ patrem catholicum , atque in toto Synodi volumine laudatum , hæreticum appellat. Hæc paucis dixi , quia ex quibus præcipue causis hac in re dubitationem tua caritas habet, in epistolis non inueni.

IV.

Et quia tua sanctitas hoc a nobis requisiuit, ut sibi de sacerdotali officio post lapsum resurgendi auctoritates scriberemus, dum se dicit de hoc Canones diuersos legisse, & diuersas sententias inuenisse, alias resurgendi, alias nequaquam posse : ideo sanctas nos generales Synodos, a Nicæna incipentes, hanc cum reliquis quatuor veneramur : quia ipsam sequentes, ceteræ in cunctis canoniciis sententiis unanimiter concordant. Nam & nos præcedentes patres sequi debemus, qui auctore Deo a sacra doctrina illorum non discordamus. A capite itaque incipientes, usque ad quartum altaris ministrum, hanc formam seruandam cognoscimus: ut sicut minorem maior præcedit in honore , ita & in criminе , & quem maior sequitur culpa , maiori plectatur vindicta , & sic postea poenitentia credatur esse fructuosa. Quid enim prodest triticum seminare , & fructum illius non colligere ? aut domum construere, & non illic habitare ? Post dignam igitur satisfactionem credimus posse rediri ad honorem , dicente Propheta. *Numquid qui cadit non adiicit ut resurgat?* Et : *Qui auersus est non reuertetur?* Et peccatori ait : *In quacumque die conuersus ingemueris , tunc saluus eris.* Vnde & Psalmista ait : *Cor mundum crea in me Deus, & Spiritum tuum rectum innoua in visceribus meis.* Ne proiicias me a facie tua, & Spiritum sanctum ne auferas a me. Dum enim petiit, ne a Domino proiceretur pro culpa sua, alienam rex Propheta simul rapuisse vxorem tremefactus expauit, & Propheta indicante flagitium suum, poenitentiam agens addebat : *Redde mihi lætitiam salutaris tui, & Spiritu principali confirma me.* Si enim condignam Deo poenitentiam non fecisset , nequaquam aliis prædicaret. Ait enim : *Docebo iniquos vias tuas, & impii ad te conuertentur.* Dum enim peccata pro-

PPP iii

spexit Propheta mundatus per pœnitentiam, non dubitauit prædicando curare aliena, & sacrificium de semetipso
Psal. 50.
 Deo offerre studuit, cum dicebat: *Sacrificium Deo spiritus contributus*. Ad hoc ista sufficerent: sed omnis sententia quo plus sacræ scripturæ testimoniis confirmatur, facilius creditur. De hoc enim propheta dicit: *Nolo mortem peccatoris, sed ut conuertatur, & uiuat*. De hoc peccantibus dicitur: *Peccator in quacumque die conuersus ingemuerit, saluus erit: omnes ini-
Ezech. 18.
 quitates eius oblinioni tradentur*. Si enim Redemptor noster, qui peccatores non perdere, sed iustificare venit, in obliuione peccantium delicta dereliquit: quis hominum condemnanda reseruat, cum Apostolus dicat: *Si Deus iustificat, quis est qui condemnet?* Ad fontem misericordiæ recurrentes, euangelii proferamus sententiam: *Gaudeo, inquit, super uno peccatore pœnitentiam agente, magis quam super nonaginta nouem iustis, qui non indigent pœnitentia*. Et ouem perditam, nonagintanouem non errantibus relictis, humero pii pastoris ad ouile reportatam Dominus ipse testatur. Si ouis perdita errans post inuentionem ad ouile humero reportatur, cur iste post pœnitentiam ad ecclesiæ ministerium lapsus non reuocetur? Sicut in Apocalypsi dicitur de ministerio ecclesiæ: *Memento unde excideris, & age pœnitentiam, & prima opera fac*. Quid enim est grauius, aut carnale delictum admittere, sine quo pauci inueniuntur, aut Dei filium iureiurando negare? In quo verbo hunc ipsum beatum Petrum apostolorum principem, ad cuius sacrum corpus indigni sedemus, lapsum esse cognoscimus. Sed post negationem pœnitentia secuta est, & post pœnitentiam misericordia data est: quia postea ab apostolatu eum non expulit, qui ante quidem ipsum se negare prædictit. Tibi haec, fili carissime, dicta sufficiant, vt illum quem conspicis delicta fletu delere, in conspectu diuinitatis non dubites misericordiam consequi: quia ille peccatorem reuersum non despicit, qui peccatores sanguine suo redimere venit.

V.

De ordinationibus vero apostolicæ sedis pontificum, vtrum post beatissimum virum Hormisdam aliqua sint addita, vestra caritas requirit. Sed usque ad Vigilii papæ tempora expositas ordinationes præsulum esse cognoscas.